

ISANGUENATAGUEQUINERI EBEREO IRAPIGUEMISANTANE

Tosorintsi inibatancáiri Itomi.

1 ¹Jiraisonori Ira Tosorintsi inibatagueantari comantantsiripague, aisati isanguenatacagaiguëri. Icomantaguetaiguëri omatsiguenga jiraisonori ²carari yamaica cataguiteripague inibatancáiri Itomisonori Ira yoguibatë Tosorintsi. Itomi jitacha Jesoquirisito. Icanqueri: "Notomi, Obiro obetsiquërone antagaisati, pasintaguetimaro omagaro, Obironta obatacaganta-sanotatsiri". Aro yobetsiquëro quibatsi, jonoquë, omagaro; aisati yobetsiquëri jonogasati, sérari, basiniri, antagaisatipague. Aro Tosorintsi imoncaraquineri Itomi ora icanqueri. ³Aisa Itomi icantasanotari ibega Iriri, aitosati yobariaguitetasanoti, igáantaguetasano-tiro omagaro. Aisa icantasanotarinta ibega Tosorintsi, aisati yoniagasantacái cara ati icanta Iriri. Cara iranintagueque ingantiro pairoraca, iritosguiro, inganquero. Patiro inibatë, aro ocarati. Sintsirosonori Irinibare ora inantacacaro omagaro ora inaguetanënguitsi. Jirai ainiro acantaguetiro ora te organinate, iroro te anganinataguëte. Carari ipoque Quirisito, icamobicáiro ora antagueti cagaro caninatatsi, yobiaquero, ipénabencáiro, isetajáiro catingasatiquë Tosorintsi, yoganinaséretacáí. Aroquenta iguisëgotacáíri Itomi Tosorintsi itsipiriacacáíri, aro quero

iguisëgotaáí yamai. Icamaque, itiaca, icabiritanaa, yogainocanaa Jonogaguítiquë, isobigopë ibacosonoriquë Tosorintsi Ira agántasanotatsi omagaro.

Quirisito ibataiguëri ira ironomireegui Tosorintsi.

⁴Aisati Itomi Tosorintsi ibatasanotai-guëri antagaisati ironomire Tosorintsi irisaanganetsite. Iriro obaqueri Iriantinta Itomi Tosorintsi, carari yobetsicaca irisaanganetsite.

⁵¿Aintaco ironomire Tosorintsi icanque:
Obiro Notomi, notomintëquemi?
Teni intomintimari ironomire. Irianti Quirisito itomintaca. Teatisati ingantocotiri irisaanganetsite Tosorintsi:

Naro pirinquima, nontomintémari.
Te ingantiri negaca. ⁶Aisati jirai cara Irirtsita igáque Itomi yaca quibatsica, icantaguëri ironomire:

Nococagaiguëri omagaro
nasaanganetsite irobaticaguerito-
tasitaigabaquimari Notomi,
intingomintaiguëmari.

⁷Icantocotaiguëri ironomire Tosorintsi:
Nagátaiguëri nonamire iragagajineri matsuengua Nanibare, iriáiguë
sintsirisonori aisa inganquimaro coguentimainga sintseingaro.
Aintasati yosigaro pamari cara pitairinga omanapague.

⁸Carari Tosorintsi icanqueri Itomi:
 Tojai pigáantasanoti omagaro
 Obironta Tosorintsi cobeingarisonori. Caninasati pigáantané pérrosati, caninaro Pinibare.
⁹Tojai pinintasantiro ora caninaro; tesonori pinintiro cara icantagueiro matsiguenga ora te ongomeite, cara te inguemisantimi. Obironta Tosorintsi, noganinaséretasantémi, pabisaiguëri pobaiguëri iraegui pitsipa.

¹⁰Aisati icanqueri Tosorintsi:
 Obiro Itingomi; jirai pobetsiquero quibatsi, Jonogaguete, aisati antagaisati ora inatsi.
¹¹⁻¹²Aiquenta omegaiguëma, carari Obiro pérrosati cara pintimané. Aisa ocanta manchaguintsi, inagatané otsonganaquima, iroquoero, inganaquero irorai; aisati ocanta otsgonganaquima oca quibatsica, omasiniatitané omeganéma; pobetsicairo irorai. Paniro Obiro quero popasiniatiti, quero popega, quero pintiasipariti.

¹³Tosorintsi te ingantématri ironomire; te ingantiri irisaanganetsite negaca: “Pisobigue yaca nobacosonoriquéca; intsome antingomibintaiguéri omagaro irooti cara nagabeimiri antagaisati ira quisraigabitëmi”. ¹⁴Omagaro ira ironomire iroonti intagueti ora icocagaiguëri Tosorintsi. Irirojegui saangatsiri te ine ibatsa te iraneingani. Igátaiguëri Tosorintsi arota iromitocataiguéri iraegui iragabisaitoïte.

**Caninataque anguemisantasantiri
 Itomi Tosorintsi.**

2 ¹Iroro icocagaigacái Tosorintsi anguengaséretiro omagaro ora icantaigaigacái Itomi, anguemisantasantiri.

Intsome angantasantiro, querota opeicotaro. ²Irianti aisonori ira Tosorintsi igátaiguëri ironomire ingomantaiguëri matsiguenga. Aisati iguisaiguëri Tosorintsi ira te inguemisantobéro Irinibare ora yogagajineri matsiguenga ira irisaanganetsite, icasitígataiguëri tsoengatsiri. ³Tojai ipomirintsibentaigacái Itomi ora iragabisaitoointaái. Yamai aroca otsoinguëri, ¿Pijiqueco isigopitaro atsipiragiantsi, querota itsipiriacagáiro Tosorintsi? Jirai Iritsita Atingomi ogometaiguëri irogomere ati onganquima cara iragabisaitoajái Iriro. Aique icomantaigacáiro ira quemaiguëri. ⁴Itsibataigari Tosorintsi imitocotaiguëri. Yagobiacaqueri cara itasongagueanti ora te oneingani jirai, aisati ocantacagaiguëri Isère Tosorintsi tojai ora iquenganeintanca matsiguenga ora icogagueti Tosorintsi. Aro igóiguë matsiguenga cara aisonori ora icantaiguëri Tosorintsi.

Jesos Itingomi antagaisati.

⁵Aro yamaica nanibatégotero basinati quibatsi cara iragáantasanté Atingomi aiquenta. Tosorintsi quero ipiri ironomire iragáantane. ⁶Aroque isanguenaque David jirai, yosamitéri Ira Tosorintsi:

Naantijegui matsiguenga, te nangantaiguemi pibega Obiro. ¿Pairo piquengabiritaiguëna? Aisati ¿Pairo piniacaninabiriqueru matsiguenga? ⁷Cara pogainaquaquina yaca quibatsica poguibatéri pisaanganetsite, yabisaguëna arosata, carari quero ocosamaniti cara irobataiguëna. Piniacaninataiguëna, aisati picantaiguëna nasintaguequimaro omagaro ora pobetsiquë yaca quibatsica.

⁸Pagobiacaquina cara
natingomibintaiguëri omagaro ira
pobetsiquë.

Ocari oca isanguenaque David. Pinetse,
icanque: "Nabisaiganaqueri omagaro,
intingomintaiguëna antagaisati inatsi".

Carari yamaica terai omoncaratima
omagaro, terai agabeiro omagaro
yobetsiquë Tosorintsi, ⁹iroro
cantënguicha icábintsasanotaigacái
Tosorintsi cara igáqueri Jesos Itomi
ipoque yaca quibatsica, itsipiriasano-
tapé icamobicái arota quero íati eiro
Sharincabeniquë. Cara irirai
imatsiguengatapé Jesos, arosata
ibataigabaqueri ironomire Tosorintsi.
Icamaque Quirisito, aro yoganiatairí
Tosorintsi yoguibatairí Itingomisonori-
quinte, icobeingatacaqueri, yabisraigairí
irisaanganetsite aitosati.

Pairo icamobique Jesos.

¹⁰Omagaro yobetsiquéro Tosorintsi,
inaguequiero, aisati igáontasantéro
antagaisati. Aisati icoque iriáiguë
omagaro itomijegui cara Jonogaguít-
quë intiomotaigapéri cara igánti Iriro.
Iroro itsipiriasantacaguëqueri cara
igáqueri Jesos ora irogóntémari cara
Iriro caninari, iroro iragabisaicoontë
mari iraegui quemisanquerine. ¹¹Aro
yoganinataigacái Jesos, iroro yamaica
ajitaguétiri Iriri: "Pabati". Aisati te
iripasiguitégotái Jesos icantaigái:
"Igue", aisati "Tsio". ¹²Jirai Quirisito
icanqueri Iriri cara Sanguenariquë:

Nongomantaiguëri igueegui aisati
tsioegui ati picanta Obiro; cara
yapatoitaigaca ira quemisantimi,
aro nangarataiguëri nangátaben-
quimi nanganinabenquimi.

¹³Aisati icanque:

Aisa nacantaigari igueegui,
naquemisanqueri Tosorintsi.

Icamque aisati:

Pinetsaiguena Naro yaca aisati
iraegui natenca, itomijegui
Tosorintsi aisati irisintoegui
ipénari Pabati cara iquemisantai-
guëna.

¹⁴Omagaro eiroegui quemisantaiguëri
Tosorintsi eanti matsiguenga,
angamaiguë. Aisa Quirisito icampái
ibega eiro cara ipaniaca Jonogaguít-
quë ipoque yaca quibatsica imatsiguenga-
tapé, icamaque. Aro icamobicái arota
iragabeiri camagari ira cogabitënguicha
irágancáime Sharincabeniquë cara
angamaque. ¹⁵Jirai otsorogaigabitacaro
cara angamaiguëme, ajáqueme
Sharincabeniquë, carari ipoque Quirisito
yogabisacotajái, yamaica tení
ontsoroguiro agamane. ¹⁶Igóiguë eiro
cara Quirisito te iromitocotaiguéri
ironomire Tosorintsi, te ingábintsai-
guéri, carari ipocasquiero ingábintsaiga-
cái eiro quemisantatsi, eironta
imatsiguenga Abaram quemisantatsiri.

¹⁷Icamque Quirisito caninasati,
imatsiguengatapé aisa icantasanotacáí
ibega eiro, ireintiegui, arota
ingantaneintégotái. Aisati icantasano-
téro omagaro ora icocaqueri Tosorintsi:
Iriantinta Itingomisonori Saseriroti
inbabencái, icamobicái arota iragabisai-
cotajái irisetáairo Tosorintsi
iromaguisantajáiro ora acantaguetomo-
tiri te organinate. ¹⁸Jirai Jesos
yagobiaqueri camagari cara icogabeca
irantacaguirime ora te organinate. Tojai
itsipirioricái Jesos igóontacaro ora
atsipiriaiguë eiro pairoraca. Aro yamai
igótasanti iromitococái cara icogabeca
camagari iromerataigáime irantacacáiro
ora quimingari.

Quirisito yabiséri ira Moisés.

3 ¹Yamai, nopiguemisantane, te
pingantajima pibega jirai.
Nongomantaiguëmi cara icoigaiquëmi

Tosorintsi pintoiomotaiguëri canta Jonoguitequënta. Pinguengaiguéri Jesos Ira piquemisantaiguë. Igáqueri Tosorintsi yaca, icomantagueantë ati icanta Tosorintsi aisati pairoraca icocacái. Irianti Itingomisonori Saseriroti inibabencái catingasatiquë Tosorintsi, yogaganacáiro anibare cara amanocoqueri.² Jirai Tosorintsi icanqueri Moisés: “Caninasati pogometiguëri pomatsiguenga, pigotacagaiguëri omagaro ora nococagaiguëri”. Aro icanquero antagaisati ora icanqueri Tosorintsi. Carari Jesos yabiséri ira Moisés, icantasanotéro omagaro ora icanqueri Iriri.³ ¿Teco aniacaminatasantiri ira obetsiquirora ibango: iroonti pongotsi, te aniacaminatasantiro? Igóque ira obetsiquirora ibango, te ogótëmate pongotsi. Aisa ocanta caninataque aniacaminatasanotiri Jesos Irironta Atingomisonori; quero aniacaminatasanotiri Moisés cagarinta Atingomi.⁴ Ainta matsiguenga obetsiquiro omagaro pongotsipague, carari yobetsiquëri Tosorintsi antagaisati timaigatsi.⁵ Aro aisonori icanquero Moisés omagaro ora icocaqueri Tosorintsi. Iroro iromeraro Tosorintsi, caninasati yogagajineri imatsiguenga ora icomantëri iriro Tosorintsi ora abisënguitsine aiquenta.⁶ Carari cagari Quirisito iromeraro Tosorintsi, Irianti Itomisonori. Icantasanotëneri Iriri antagaisati ora icocaqueri. Irianti Itingomi omagaro ira quemisantatsiri. Aroca asëretaiganaque-mari përosati, anguemisantasantaiguëri, igóiguë eiro cara irágancáí Jonoguitequë. Caninataque anganinabentäiguéri, aro igóiguë cara omatsiguengatacari Tosorintsi.

Tosorintsi iguisaiguëri ira tsoengaiguëri aisa pégataigari.

⁷ Jirai osanguenatacaqueri David Isère Tosorintsi, icanti:

Yamai, omagaro cataguiteriquë, aroca pinguemaigabaquero ora inibatëmi Tosorintsi,⁸ quero pipégatsataigari, queroootisati pitsoinguiri. Quero picantaigari ibega pomatsiguenga jirai cara ipégataigabitacari Tosorintsi canta tenta ontimingani, ijitaigabitaca quero icasisítigatiri.⁹ Icanque Iriro: “Aisonori ipégataigabitina pomatsiguenga jirai, iniantaiguëna aroca nangasitígataiguëri. Iniaigabitaro tojai ora nitasonguëneri; carari natsipiriasicaro tenta iranintaigue inguemisantaiguena.¹⁰ Cosamani 40 osarini ipégataiguëna. Iroro naguisaneintaguëqueri, nacantaiguëri: ‘Pérōsatí cara pitsoingaiguëna, pérōsatí cara pipégataiguina. Te pinguenganeintina. Te pingogue pigóigue pairoraca nococagaiguëmi’.¹¹ Iroro naguisaneintaguëqueri, nacantasanotaiguëri: ‘Quero paretaiga iroraiquë quibatsi, quero nimagoriaséretagaiguimi canta caninaguiteroqué’.

Oca osanguenaca jirai.

¹² Nopiguemisantane, pigamaiguema querota pitsoinguiri Tosorintsi catimanerisonori. Te pinganinasérete cara te pinguemisantiri, pijocanéri, popeicotari. Cara pinganque negaca, cara pomaintiri Tosorintsi caninarisonoriguiente, obiro te pingomeite.¹³ Iroonti caninataque omagaro cataguiteri pingantobaguima pisintsiséretobaguima paníropague cara pérōsatí pinguemisan-tasanéri Tosorintsi, arota quero yamatobitimi camagari inganquemi pomaguisantiri Tosorintsi, pigatsitairo quimingaro ora pijoque jirai.¹⁴ Carari aroca pérōsatí anguemisantasantanéri

Quirisito, asëretanëmari, igóiguë cara antsibatëmari Jonogaguitequë.¹⁵ Ocanti Sanguenari:

Yamai, omagaro cataguiteriquë,
aroca pinguemaigabaquero ora
irinibaquemi Tosorintsi, quero
pipëgatsataigari, querootisati
pitsoinguiri. Quero picantaigari
ibega pomatsiguenga jirai.

¹⁶ ¿Pairi quemaigabitacari Tosorintsi,
carari te inguemisantiri, ipégataigari?
Iriantiegui antagaisati ira yomisotocai-
guë Moisés cara Ejípitoquë.¹⁷ ¿Pairi
itsirishaigaca Tosorintsi, iguisaguëri
tojai osarini ocarati 40? Iraegui te
inguemisantaigueri, tojaipague
icantaguetiro ora te onganinate. Aro
Tosorintsi inintacagaguëri icamaiguë
cara tera ontimingani.¹⁸ Tenta
inguemisantaigueri, iroro icantasanota-
guëqueri: “Quero paretaiga iroraiquë
quibatsi, quero nimagoriasëretagaiguimi
canta caninaguiteroquë”.¹⁹ Iroro igóiguë
eiro cara tigueti ingantaiguema
ingaiganaque caninaguiteroquë tenta
inguemisantaigueri Tosorintsi.

Icoguini Tosorintsi iromagoriasëretagái.

4 ¹Pinetse, icancái Tosorintsi: “Aroca
pinguemisantaiguëna, náganëmi
Jonogaguitequë, pintoquena Naro,
nomagoriasëretaquemí”. Intsome
agamaiguema querota acantaigari ibega
iraegui te inguemisante jirai, te
iraretimaro caninaguiteroquë.

²Aquemaigabaquero Caninaro
Nibarintsi cara Quirisito iragabisaicota-
jiri pairiraca quemisanquerine iráganéri
jonoquë. Aisa icanta irirojegui jirai
i quemocotaiguëro caninaro quibatsi
icasiriconiatitanëneri iriro Tosorintsi,
carari te inguemisantiri, te ingaigapë
caninaguiteroquë.

³Aroque imagoriasëretacái Tosorintsi
eiroegui quemisanqueri, aisati

antiomoqueri Jonogaguitequë përosati,
carari quero imagoriasëreti irirojegui ira-
te inguemisantiri. Icanque Tosorintsi:

Naguisaneintaiguëri, nacantasano-
taiguëri: “Quero picaigui
obiroyegui canta iroraiquë
quibatsi, quero nimagoriasëretagau-
mi canta caninaguitero-
quë”.

Jirai Tosorintsi yobetsiquëro omagaro
quibatsi aisati Jonogaguite, itsonquero
imagingoriaque. Aisati yobetsiquëneri
matsiguenga iromagoriasëremento,
carari tenta inguemisantaigue, te
iromagoriantimaro.⁴ Cara
Sanguenariquë icantocoquero
cataguiteri comagoriantague, iroonti
sábaro:

Ocarati 6 cataguiteri Tosorintsi
yobetsiquëro antagaisati. Aroque.
Aique cataguiteriquë 7
imagingoriaque. Aro ocarati.

⁵Aisati icanqueri Tosorintsi:

Quero paretaiga iroraiquë quibatsi,
quero nimagoriasëretagaiguimi
canta caninaguiteroquë.

⁶Aro ocaninati ora icanque Tosorintsi
jirai, carari te iromagoriasëretaigue ira
quemaigabitacari tenta inguemisantaigueri.
Carari yamai aintapague
quemisantatsi imagingoriasëretaigue
Tosorinti.⁷ Pabisaignaque tojai osarini,
aro icanai Tosorintsi aisati, “Yamai
cataguiteri, nococagaiguëri matsiguenga
inguemisantina, aro nomagoriasëretagau-
mi”. Irooti isanguenatacqueri
David:

Yamai, omagaro cataguiteriquë,
aroca pinguemaigabaquero ora
inibatëmi Tosorintsi, quero
pipëgatsataigari, querootisati
pitsoinguiri.

⁸Arome ingaaganëri imatsiguenga Josoé
cara caninaguiteroquë, querome
Tosorintsi isanguenatacaguirime David

cara isanguenatocoquero basiniati cataguiteri cara iromagoriaséretaiquë quemisantatsiri. ⁹Iroro igóiguë eiro aiquenta iráganéri Jonagaguitequë antagaisati ira quemisantaiguëri Tosorintsi, intiomotaigapéri pérrosati, quero ipomirintsiténmati itarobacaatají arota iraretimaro Jongaguite.

¹⁰Pairiraca abencari Tosorintsi, imagoriaséretapé. Jirai itsonquero itarobacaare Tosorintsi cara yobetsicaguequero omagaro, aique imagoriaque, te irantaje aisati. Aisati eiro, aroca ajáque cara Iriloquë, aisa angantaigapémari ibega Irilo, imagoriaséretaiquë.

¹¹Intsome ongogasante aretaiguëma canta Tosorintsiqué cara iromagoriasé retacái. Quero ipégatari, queroootisati itsoinguiri. Queroca aquemisantiri quero aretari. ¹²Igóiguë eiro cara Tosorintsi catimanerisonori. Te ongométatomotiri pairoraca. Intiro pairoraca inganque. Igóti antagaisati. Inibatantaro Irinibare ora ogótacacái ati acanta asérequë. Irinibare aisa ocantaro sabiri catsébarosonori pitrooti cara ocaraque tsomogui. Igótasantiro Tosorintsi ora aquenga aisati igótasantiro ora ocogui aisati ora anganque, omagaro. ¹³Te pairoraca ongantima ománomotimari Tosorintsi, teatisati pairiraca ingantima irománomotimari ora icanque, igótasanotacáinta ati acanta aisati atiraca inaigui eiro. Iniasanotiro omagaro. Ingomantégotacái acaninatica eiro aisati ainiroca aquemisanqueri.

Jesos icantari ibega itingomi saseriroti.

¹⁴Intsome anguemisantaiganaqueri Tosorintsi pérrosati aintanta Jesos Itomi yogainocanaca cara Jonagaguitequë cara inbabencái catingasati Iririquë. Irianti Itingomisonori Saseriroti

yabisaiguëri omagaro basini saseriroti-jegui. ¹⁵Jirai imatsiguengatapé Jesos, itsipiriagueque pairoraca, aisati ira Satanás icogabeca irantacaquerime ora te organinate, carari te irantiro. Iroro igóontacaro Jesos ora atsipiriaiguë eiro yamai, aisati igóque ati icancái camagari. Igóque ora pomirintsitomocái, yogaséretococái icantaneintégotacái, icábintsacái, imitococái. ¹⁶Aro quero yamai otsoroguiri omanocotiri Tosorintsi, igóquenta inguemacái, ingantaneintégotacái ingábintsacái iromitococái.

Ati icanta itingomi saseriroti.

5 ¹Ira matsiguenga icoiguë Tosorintsi ipiaqueri itingomi saseriroti, icocaqueri iromanocotaiguëri imatsiguenga. Aisati yógueneri Tosorintsi ibrapague ira ipaiguë matsiguenga. Aisati icomantéri matsiguenga cara icaninatasanoti Tosorintsi. Aintaca poro antaguetiro ora te organinate, ira saseriroti óguérine ibira ira yampé cantaguetatsiri, itaquineri Tosorintsi. Aique yágacaninatéri matsiguenga Tosorintsi aroquenta iquemisanqueri. ²Ira itingomi saseriroti aisati icancái ibega eiro: matsiguenga ini. Igóque ingantaneintégotacái eiro cara angantaguetiro quimingaro, ainirona icantaguetiro iriro ora te organinate. ³Iroro yóguéquineri Tosorintsi iraisati oisha, itaquineri. Aique iróquieri Tosorintsi iroishatepague imatsiguenga cantaguetatsiri. ⁴Te pairi pegachane itingomi saseriroti iriati, irianti ipiaque Tosorintsi, aisa ocanta jirai cara Tosorintsi icoiguëri Aarón ipiaqueri itingomi saseriroti.

⁵Aisa icanta Quirisito, te imeguima Iriati Saseriroti. Irianti icoiguë Iriri, ipiaqueri Itingomisonori saseriroti. Te

ingantiro Iriati, carari icanqueri Tosorintsi:

Obiro Notomi, notomintëmi yamaica.

⁶Aisati icanqueri basiniquë Sanguenari: Pérrosati Obiro Saseriroti, pisaserirotë cara picantari ibega Meriquisirec.

⁷Jirai cara inasegui Quirisito yaca quibatsica, tojai yamanopiantiri Iriri, iragasantaca, aisati icaimëri Tosorintsi, icanqueri: “Pabati, aroca nangamaque, nigóquimi pingabiritajina”.

Iquemisantasanoñerinta Tosorintsi, aro ipéri ora yamanocoque. ⁸Aisonori, Iriro Itomi Tosorintsi, carari iquemisantasanoñeri Iriri, iroro itsipiriasantaguëque pairoraca. Aro igótanéro ati ocanta cara aquemisantiri eiro, atsipiriaque. ⁹Cara iquemisantasanoñeri Tosorintsi omagaro icocaqueri, iroro Tosorintsi igóntacari Ira Itomi cara Irianti caninarisonoriguinte, yagobeiro cara iragabisaicotai-gairi antagaisati quemisantaiguëri Iriro. Yamai quero iáti eiro Sharincabeniquë, carari irágancacái Jonogaginequë antiomoqueri pérrosati. ¹⁰Tosorintsi ipiaqueri Itomi Itingomi saseriroti, icanqueri:

Obiro Saseriroti, pisaserirotë cara picantari ibega Meriquisirec.

Terai inguemisantasante iraegui isanguenaquine.

¹¹Aiti tojai nocogabeca nogótacagai-guemi carari ocomëtaguetomotaiguëmi tenta pingogaigue pinguemisantaigabäquero. ¹²Jirai tojai osarini piquemisan-taigabitaca, carari yamai picantaigari ibega ira terai inguemisante.

Organinateme yamai pogometaiquë rime basini, carari picogaigue irogótaca- gaigaimi aitosati irootisati ora yogometaiquëmi jirai. Aisati picantari ibega janequi, picogaiguero pitsomi

tigueti ongantima popero basini coshori.

¹³Ira aisa icantari tsorori janequi, icogui itsomi, te irogóontimaro ora caninaro, teatisati irogótiro ora te organinate, tenta inguemisantasantiro Irinibare Tosorintsi. Irari antiasiparitatsi yosigari quemisantasantsirsiri. ¹⁴Carari pinguemisantasantaiguëime Tosorintsi, pingogaiguëme poperi irasi antiasipari. Pigótasantaiguërome paio caninari pinganque aisati pigóiguërome ora te ongomeite, quero picantiro.

Icamanaaiguëri quemisantabetachari cara aíquero inguemisantasantanëri Quirisito.

6 ¹Iroro ora quero nogatsitaimiro ora nopalintaca nogometocotopianteri Quirisito tenta omomirintsite. Caninataque aíquero pijáiganaquitigue pigótasantanéro omagaro ora icocagaiguëmi Tosorintsi.

Nogometaiquëmi jirai: “Quero picantasitaguetaro pairoraca, queronta pogabisaicotimi; tigueti pingantima pigabisaicotima obiat. Caninataque pinguemisantiri Quirisito arota iragabisaicotajimi Tosorintsi.

²Pomaotisabiritaiguëmari Quirisito arota irogótocotimi matsiguenga cara piquemisantiri. Cara pomanocoqueri Tosorintsi iromitocotiri popiguemisan-tane, poguineri pobaco iguitoquë. Cara angamaque angabiritanaima, iraganiatamacái Tosorintsi. Aisati ingomantëgotaigacái”. Aro quero nogatsitaimiro oca aroquenta pigóiguëro. ³Aroca iranintacaquina Tosorintsi, nogometaiquëmiro irorai arota pigótasanotanéro ora icocagaiguëmi Tosorintsi.

⁴Pinetsaigue. Aintapague matsiguenga iquemabecaro Irinibare Tosorintsi, icinanabentabecari Tosorintsi cara icábintسابتacari, omitocotabecari Isére Tosorintsi coshoni poguëri. ⁵Aisati

igótabecaro caninaro Irinibare
Tosorintsi, icinanabentabecaro;
iniaguetabecaro cara itasongomoqueri
ira comantégotaiguëri Quirisito,
igótabecari Itingomi. ⁶Oca igótabecaro
omagaro, carari ipigapaa yomagusanta-
jiro ijocajiro, itsoinguëri Quirisito Ira
iquemisantabeca jirai. Cara ijocajiro
cara iquemisantabecari Quirisito, aisati
icanca ipéicotajirini Quirisito.
Itsoinguëri iriro, aitosati icoque
iritsoengagajiri basini matsiguenga cara
irisérontaiguëmari Quirisito aisati.
Tigueti ingantima imasiniatitajima
inguemisantasantairi ira quemisantabe-
tacha aroquenta ijocajiri Quirisito.
Pigamemari, quero picantari ibega iriro.
⁷Ira quemisantasantatsi yosigaro
quibatsi cara opariaque angani,
oquibianë panguirintspague,
oguitsonänéri ira panguitiro.
Tosorintsi aganinatéro oca quibatsica
caninari. ⁸Carari ira quemisantabetacha
yosigaro basini quibatsi cara aitosati
opariaque angani. Ipanguitéro
caninaguitsori, carari te ontojaigue
panguirintsi. Otojaiganaque totsei aisati
porontsipague. Aniaquero ora
quibatsira, angantocoquero: “Te
onganinate quibatsi. Intsome oporoiro,
ataguiro omagaro”. Pigamema; quero
picantaro ora quibatsi te ongomeite.

Yoganinataiguëri ira isanguenaquine.

⁹Aroque nacamanaaiguëmi,
nanintaneegui, carari nagamëmi
aisonori cara piquemisantaiguëri
Quirisito, yogabisaicotaigaimi, aro
pitimaiguë caninasati picanquero
caninaropague. Aisa picantaro quibatsi
caninaro ora omitojaiganaquero oguitso.
¹⁰Tosorintsi Irianti caninarisonoriguinte,
quero ipeicotaro cara pomitocotaiguëri
popiguemisantane jirai, pinintaiguëri,
përosati cara picantiro yamai.

¹¹Nococagasantaguëmi paniropague
cara përosati pingábintsaigueri
popiguemisantane, aisati aiquero
pinguemisantasantaiganaqueri
Tosorintsi, pigueiri Atingomi cara
iribocapé irágaignaqueemi Jonogaguít-
quë. ¹²Quero poperabiritaro ora
icocaquemi Tosorintsi. Iroonti
pingantaiguemari ibega iraegui
quemisantatsiri icantasantaiguineri
Tosorintsi antagaisati ora icocaqueri,
irágobëro omagaro ora yobetsicaiguë
neri Tosorintsi.

¹³Pinetse, cara ocogui ogótacaguiri
matsiguenga cara aisonori acantiri,
acanque: “Igóti Tosorintsi aisonori oca
nacanquemica. Aroca nomatobiquimi,
iratsipiriacaguinata”. Te aisa ingantáí
Tosorintsi. Jirai cara Tosorintsi
icantasanoñéri Abaram cara iméri itomi,
tenta irine basini ibatiri Iriro, patiro
icanqueri: “Aisonori oca nocamtémi,
Naronta Tosorintsi; quero nopasiniatiti-
miro Nanibare, quero namatobitimi”.

¹⁴Aisati icanneri ira Abaram:

Aisonori, tojai nangantocobintimi,
tojai nangábintseñi,
nomitocoquemi, tojai
nomitojaiganaqueri pomatsigue-
ngajegui.

¹⁵Aro antsinitati yoguaqueri Abaram
irootu cara imoncaraquero Irinibare
Tosorintsi. ¹⁶Cara pairiraca matsiguenga
icogui irogótacaqueri basini cara
icanqueri ora aisonori, inganqueri:
“Aisonori nacanquemi, iniaquina
Tosorintsi, igóque. Queroca aisonori,
nocoguini iratsipiriacaguina”. Aro
irogóque cara quero yamatobitiri
imatsiguenga, Irironta cobeingarisonori
Tosorintsi. ¹⁷Cara icoque Tosorintsi
irogótacagaiguëri iraegui quemisanqueri
cara aiquenta imaguëri omagaro ora
yogaiguëri, icantaiguëri: “Aisonori
omagaro oca nongomantaiguëmi Naanti

Tosorintsi. Quero nopalasiniatitiro Nanibare".¹⁸ Aro aisonori Irinibare Tosorintsi: teni irogóte intsoiguema. Carari aisati icanque: "Aisonori oca nongomantaiguëmi", aro igóiguë eiro cara quero yamatobianti. Yamai aroca abentimari, igótasantí eiro iromoncaraquero ora icancái: ingábintsaigacái, iragabisaicotajái.¹⁹ Aroca igóiguë yogabisaicocái, aro anganinabentasantéri, quero ogaséreta aisati. Aisati igóiguë inguemacái Tosorintsi cara omanocoqueri, aisati aiquenta arequima eiro cara Tosorintsiquë tigueti oticobacáine.²⁰ Ainta Jesos canta yamaica, icamobicái ibacái jonoquë, cara inibabencái Irironta Itingomisonori Saseriroti pérrosati cara icantari ibega Meriquisirec.

**Ira Meriquisirec yabisiguëri
saserirotijegui imatsiguenga Irebí.**

7 ¹Yamai nongomantëgotémiri ira Meriquisirec. Iriro jirai itingomi Saremisisati. Aisati ipiaqueri saseriroti Tosorintsi Ira jonoquénintaberi. Aisati ainta Abaram. Yágaiganaqueri iratirite, yoguiaitagananqueri catsimari ira áganéri itomitsari. Imabocapéri ipoguiriaigapéri catsimari antagaisati itingomipague. Yamaigapairi itomitsari aisati ibiraegui ira yágabitanaca catsimari aisati yampé tojai basini ora yasantabeca pairorapagueraca. Cara ipigapaa itonguibotbacari Meriquisirec, icabéri: "Ingábintsemita Tosorintsi".
²Aique yágarantéro Abaram ora yágabitsataiguëri catsimari, ipagaranqueri Meriquisirec, icanqueri: "Jeroca irasi Tosorintsi". Aitica 10, aro ipéri patiro irasi Tosorintsi. Ira saseriroti ijita Meriquisirec, ora iripajiro ocanti caninarisonori. Aisati itingomi Saremisisati. Sarem ocanti caninasati itimaigui. ³Iriro te irisanguenatëgote-

ngani iriri teatisati iniro. Te irogótingani atiraca ocanta cara iboguë, teatisati irogótingani atiraca ocanta cara icamaque. Aisa ocanta pérrosati itimi, iriro icantari ibega Itomi Tosorintsi Ira pérrosati itimi isaserirotitasantanë.

⁴Pinguengueri Meriquisirec iranti abiséri Abaram jirai. Abaram iparintaigacari joríojegui, carari itingomincari Meriquisirec iriro, ipagaranqueri 1/10 (aitica 10, ipéri patiro) ora yágabitsataiguëri iripoguiriane. Aisonori Meriquisirec yabiséri Abaram. ⁵Aique itojaiganaque imatsiguenga Abaram irooti cara inë Irebí. Aro Tosorintsi isanguenatacaqueri Moisés: "Tosorintsi ipegaiguëri saserirotijegui imatsiguenga Irebí. Aisati icocaqueri joríojegui imagaranqueri saseriroti arosata iraisati, ibira, ibanguire, iguireguite, omagaro. Aintaca 10, iméri paniro". Aro isaserirotöté Irebí aisati imatsiguenga, antagaisati ipaniaca Abaranquë. ⁶Ira Meriquisirec cagari imatsiguenga Irebí, carari iriro saserirotítenguitsi, yágobëneri Abaram cara ipagarampéri 1/10 iguireguite aisati ibiraegui (aintaca 10, ipéri paniro) ora irasi Abaram. Aique icabéri: "Ingábintsemita Tosorintsi". Aro icantocabentobëri Abaram, ira icanque Tosorintsi intojaiganaqueta imatsiguenga. ⁷Yamai igóiguë cara Meriquisirec obaqueri Abaram, yabiséri icanquerinta, "Ingábintsemita Tosorintsi". ⁸Yamai iraegui saseriroti yágapinquieri 1/10 (aintaca 10, yáguë paniro) ira ipagarantaiguëri matsiguenga, carari iraegui saseriroti imoncaracái cara icamaque. Iriro cantënguicha ira Meriquisirec inasitaca. Icantabeca te ingame iriro tenta ongantocotiri Sanguenari cara icamaque. ⁹⁻¹⁰Jirai ipagaranqueri Abaram arosata (110: aitica 10, ipéri patiro) ora yágabitsaqueri catsimari itingomipague.

Yamai yágobëri 1/10 ira saseriroti imatsiguenga Irebí. Cara Abaram itonguibocari Meriquisirec jirai ipagarantobëri 1/10. Arome irinaqueme Irebí, imagaranquerime ira Meriquisirec aitosati. Meriquisirec yabisaganaqueri Irebí aisati antagaisati imatsiguenga.

Ira saserirotijegui, imatsiguenga Irebí, tigue ingantima iragabisaicotái.

¹¹ Jirai itingomi saseriroti iranti Aarón cara Tosorintsi isanguentacaqueri Moisés. Isanguenatocotaiguëri saserirotipague paniacha Aarónquë aisati Irebíquë. Itimaigabita tiguetinta ingantima iragabisaicotajiri imatsiguenga. Iroro Tosorintsi igátaguëqueri basiniasi Saseriroti, cagari imatsiguenga Irebí, Irianti cantari ibega Meriquisirec. ¹² Aro Ira Saseriroti basini igáque Tosorintsi iripégairi saserirotijegui imatsiguenga Irebí. Aisati tenta pairi abisaicoontimaronne isanguenare Moisés, tiguetinta ongantima iromoncaratiro, aiti irorai Nibarintsi Caninaro opégajiro ora inaga isanguenare Moisés. Yamai Tosorintsi quero icantái omoncaratiro ora isanguenaque Moisés. ¹³⁻¹⁴ Aisati Ira Saseriroti Irianti imatsiguenga Jorá cara igóiguë eiro, te aro imaniema Irebíquë. Jirai te irisaserirotite pairiraca imatsiguenga Jorá tenta Moisés irisanguenatégotématri saseriroti paniënguicha Joráquë. Irianti isanguenatocoque iraegui irasi Irebí. ¹⁵ Yamai igóiguë eiro ainta Jesos Irianti Irirai Saseriroti aisa icantari ibega Meriquisirec. ¹⁶ Ira Jesos te iromatsiguengatimari Irebí carari isaserirotitascaqueri Tosorintsi aroquenta icaniatanë pérrosati. ¹⁷ Irootisati icanqueri Tosorintsi jirai:

Obiro Saseriroti pérrosati cara picantari ibega Meriquisirec.

¹⁸ Yamai pinabitaca ora isanguenatocotaiguëri saseriroti imatsiguenga Irebí, tsongaca. Te ingogue Tosorintsi omomirintsitairo yamai tenta ogabisaicotajái, aisati tenta oretacagái Tosorintsiqüë. ¹⁹ Tiguetinta ongantima omoncaratiro isanguenare Moisés, quero pogabisaicotiri pairiraca. Carari cara anguemisanqueri Quirisito, iragabisaicotajái Tosorintsi, irojocajáiro ora acantagueti te onganinate, intimacagajái. Quirisito yaretacacái canta Tosorintsiqüë, igótacacáiri Iriri.

Icanque Tosorintsi: “Aisonori pérrosati isaserirotitanë Quirisito”.

²⁰⁻²¹ Te ingantasitima Tosorintsi, icantasantí:

Naro Tosorintsi; oca nongomantëmi yamai, quero nopasiniatitiro Nanibare: “Obiro Saseriroti pérrosati”.

Quirisito te aisa ingantimari ibega saserirotipague imatsiguenga Irebí. Irirojegui ipegaigaca saseriroti cara isanguenatocotaiguëri Moisés, carari Tosorintsi ipiaqueri Jesos Saseriroti. ²² Aisonori Jesos ibataiguëri basinipague saseriroti, aisati igótacacáí cara iragabisaicotaigairi Tosorintsi irasintaiguëmari antagaisati ira quemisantaiguëri. ²³ Tojai inaigabitaca iraegui saseriroti imatsiguenga Irebí aroquenta panironaque icamaiguë te pérrosati cara irisaserirotitaiganaque, ²⁴ carari Jeso quirisito pérrosati isaserirotitanë Irironta timatsi pérrosati. ²⁵ Pérrosati cara inganquima iragabisaicontimari iraegui quemisanqueri, ira cogasantatsi iraretacaquimari catingasatiquë Tosorintsi. Pérrosatinta itimi Jesos, pérrosati inibabentanëneri iraisati.

²⁶ Aisonori, Jesos caminasatisonori isaserirotibentaiguëri quemisantatsiri,

Irironta caninarisonoriguiente, te ingantématiro quimingari, te ingantaguëtëmatiro, te aisa ingantimari iraegui cantaguetasanotatsi yaca quibatsica; aisati icaiméri Tosorintsi itempari cara Jonogaguitequë.²⁷ Te aisa ingantimari ibega ira basini itingomi saseriroti. Antagaisati cataguiteri yógapininquieri Tosorintsi ibirapague itaquieri, tojai iquanquero ora te organinate icantagueti iriro aisati ora icantagueti imatsiguengajegui. Carari te irógoantineri ibira Quirisito, patironta icamobicáí Iriro. Aroque, antagati. Quero icamaji aisati.²⁸ Jirai isanguenaque Moisés: isaserirotaiga-naque imatsiguenga Irebí. Iriantiegui matsiguenga ini, ainiro icantaguetiro ora te organinate. Iroro canténguicha aique Tosorintsi cantégotéri Quirisito: “Naronta Tosorintsi aisonori oca nocomantémica: përosati isaserirotitanë Notomi Irianti caninarisonoriguiente”.

**Isaserirotitanë Quirisito canta
Jonogaguitequënta.**

8 ¹Yamai nocogui pigótasantaigue cara Jesoquirisito ibataiguëri antagaisati basini saserirotijegui. Iriro Itingomisonori Saseriroti. Yamai ainta Iriro Jonogaguitequë, isobiaque ibacosonoriquë Tosorintsi Ira cobeingari. ²Ira imatsiguenga Irebí yamanopiantaiguëri Tosorintsi cara pongotsiquë ora yobetsiquë matsiguenga, ojita ibango Tosorintsi. Carari Quirisito Itingomisonori Saseriroti, inibabencáí catingasatiquë Tosorintsi Jonogaguitequë cara ibangosonoriquë ora yobetsiquë matsiguenga. ³Ira itingomi saseriroti ipapinquieri Tosorintsi pairiraca; tojai itoquieri yóguëneri ibirapague matsiguenga, itaquieri. Carari Quirisito

te iróguiri ibira; Iriati pacari Tosorintsi iganiamento cara icamobicáí. Aique iáque Jonogaguitequë icampéri Tosorintsi: “Yamai aroque nacamobitai-guëri matsiguengajegui niraatanëneri arota nagabisaicotajiri”. ⁴Aintame Quirisito yamai yaca quibatsica, querome isaserirotitime, aintanta yaca saseriroti imatsiguenga Irebí yógapininquieri Tosorintsi ibirapague cara isanguenatocotaiguëri Moisés.

⁵Icantopiantabitaca ora icanquieri Tosorintsi. Icantopiantiro yaca quibatsica cara ibangoquë Tosorintsi cara antagaisati iroonti osiacagomento ora inatsi Jonogaguitequë cara itimi Tosorintsi. Jirai cara Moisés irirai obetsiquëneri Tosorintsi ibango, icanqueri Tosorintsi: “Canta oguitojaquë jitacha Sinaí nogometasantëmiro atiraca organquima cara pobetsiquënaro nobango. Pobetsiquinaro aisati ongantasantëmaro ora noniaguëmi”.

⁶Ocaninatabitaca ora isanguenaque Moisés jirai ora isaserirotitanca imatsiguenga Irebí, icanquieri Tosorintsi, inibabentaiguëri imatsiguenga. Carari oca icantasantë yamai Tosorintsi ocaninatasanti, tojai ora irorai Nibarintsi pabiséro isanguenare Moisés. Aisa icanta Quirisito, tojai icantasanoteneri Iriri, tojai yabisëri saseriroti imatsiguenga Irebí. ⁷Onganinatasantëme ora isanguenaque Moisés, aroma irabisaicoontëmarome matsiguenga, querome icomantiri Tosorintsi basini Nibarintsi. ⁸Carari jirai te iraganinata-gueri Tosorintsi jorío jegui tiguetinta ingantima iromoncaratiro isanguenare Moisés. Iroro aiquero isanguenata-guëque basini:

Icanque Atingomi: “Aiquenta nomaguëri jorío jegui irorai Nibarintsi; nongomantaiguëri

antagaisati Isirael aisati omagaro ira paniacha Joráquë. ⁹Ora irorai quero ocantaro pibega inaga ora nacantaiguëri. Jirai itimaigasegui omagaro joríojegui Ejípitoquë, carari nomisotocaigairi nágainaqueri basiniatiquë quibatsi. Te iromoncarataiguero ora nacantaiguëri, te inguemisan-taiguena, iroro nojoguétanéri.

¹⁰Ora irorai Nibarintsi nongomantaiguëri aiquenta aisa onganquima negaca: nogótacaqueri ora nococaqueri, aisati nangueancagaiguëri Nanibare, quero ipeicotaro. Nasintaigacari: irajiquina Naro Itosorintsite aisati najitaiguëri irirojegui nasiati. ¹¹Aique quero pairi ogometiri imatsiguenga querootisati irenti; quero icantiri: ‘Pigótiri Atingomi’, aronta irogótaiguëna antagaisati, itingomipague aisati ira cagari itingomi, antiasipari aisati janequi, omagaro irogóiguëna. ¹²Nangábintsaiguëri, nojocajineri ora icantaguetomoquina te onganinate, quero naquengairo aisati ora icantagueti”.

Oca icanqueri jorío Tosorintsi cara isanguenatacaqueri Jeremías, comantantatsiri jirai.

¹³Cara icanqueri Tosorintsi “Nomaiguëri irorai Nibarintsi, quero ocantaro pibega ora inaga jirai”, aisa ocanta otsonganaquimaca ora inaga pénibaque omeganëma. Yamai teni omomirintsibentimaro isanguenare Moisés.

Ati ocanta ibango Tosorintsi cara yamanaigui saserirotipague.

9 ¹Jirai Tosorintsi icomantaiguëri jorío omatsiguenga ati ocanta icocaqueri cara yamanocotopiantai-

guëri, aisati icanqueri ati ocanta pongotsi cara icanquineri Tosorintsi saserirotipuegi inibabentaiguëri omatsiguenga. Ora pongotsi aisa ocantaro pibega tocoyapango cantaca cáripa. ²Aiti yotigantaro, aique cara tsomaguira pongotsi icantopiantaiguineri Tosorintsi saseriroti ora irasi. Aiti pinasegui irobotane aisati aiti mesa. Cara mesaqué aiti pan ocarati 12 iraperi saserirotipague. Ora pan oniaguëri ainta Tosorintsi cara. Oca pongotsica iroonti ibango Tosorintsi. ³Aique aiti basini yotigantaro oquibepiriga; tsomaguisonorrina inasanti Tosorintsi cara te ingue saserirotipuegi. ⁴Cara, aiti ora itagantapiniantaro casangajengaro, iroro yobetsicantari oro otsibataro yotigantaro cara inasanti Tosorintsi tsomaguisonorinta. Aisati aiti cara cajón itiriantacaro oro aisati. Tsomagui cajónqué aiti maba pinasegui: ora cobiti yobetsicantari oro jagaca maná cantaca pan; aisati aiti igotiqui Aarón ora quitsotanënguitsi jirai; aisati ora pite mopë cara isanguenaproero Tosorintsi 10 iragáantane ora ipéri Moisés jirai. ⁵Cara jonoica cajón ainta pite irosciagomento irisaanganetsite Tosorintsi ijita querobín. Ira querobín iriro ogótacaguiri cara ainta Tosorintsi iquëtaguitetasanti cara. Aisati inetsaiguëro otataro cajón cara ishaguëtopiantiro omagaro osarini itingomi saseriroti ora iraraa chibo aisati irasi sérari baaca. Cara Tosorintsi iniobéro iraraa, ijocaigneri jorío ora icantagueti quimingaro, yomaguisantneri. Carari yamai quero notsatengu-miro basini ati ocantaguetu.

⁶Aro yobetsiquëro pongotsi negaraca cara yoniaguëri Moisés Tosorintsi. Cara, icapinintaiqui saserirotipague antagaisati cataguiteri icantaiguëneri Tosorintsi ora icocagaiguëri. ⁷Carari tsomaguisonori te

ingaigue aitinta yotigantaro
oquibepiriga. Irianti itingomi saseriroti
catsi cara tsomaguisonorinta, patiro iqui
poro osarini yabisanaquero yotigantaro
patirontiati. Yóguéneri Tosorintsi sérari
baaca iraisati, aisati chibo irasi
imatsiguenga, aique icanaque paniro,
yáganéro iraraa, ishaguéantaparo
otataroqué cajón, yamanopéri Tosorintsi:
“Pabati, pingábintsaiguena, pijocaigai-
naro ora nacantagueti te ongomeite naro
aisati ora icantagueti nomatsiguenga;
quero piguisaigainaro aisati, quero
piquengairo”. Aro nega icantopiantero
itingomi saseriroti antagaisati osarini.
⁸Pinguenguero yotigantaro, cara
poticaiguéri omagaro basini saseriroti
aisati omagaro joríojegui cara quero
icaigui. Tigueti inganéma ingaigapé cara
catingasatiqué Tosorintsi. Oca
pogomeanta Isére Tosorintsi, igóiguë eiro
cara pérrosati pinasegui yotigantaro,
teraiquerai iraretimari Tosorintsi
matsiguenga. ⁹Caninataque anguenguero
oca arota ogóontimaro yamai:
antagaisati ora ipapinintaiguéri
Tosorintsi joríojegui jirai aisati omagaro
ibirapague yógapinintineri itaquineri,
tigueti ongantima organinaséretaiqueri
ira paigabitari Tosorintsi. Pérrosati
igóiguë iriro cara te iraganinataqueri
Tosorintsi. ¹⁰Jirai Moisés yogometasitai-
gari joríojegui: pairoraca yapaigui, aisati
pairoraca yógaigaca, aisati atiraca icanta
iubitopiantaiga, tojai pairoraca cantacha
nega. Irooti ora icocagaiguéri Tosorintsi
jirai. Carari aro ocarati yamai. Ipoque
yamai Quirisito Ira oguaigui cosamani.
Yamai pinasitaca ora icocacái Tosorintsi,
irorai, ocaninatasanti yamai.

**Ira Quirisito yoganinaséretéri ira
quemisantatsiri yamai.**

¹¹Aroque ipoque Quirisito aisa
icampari ibega itingomi saseriroti,

carari icábintsacái Iriro icamobicái,
Irironta Itingomisonori Saseriroti. Ora
icanque Iriro caninarisonori. Jirai
icantabeca saserirotijegui cara
pongotsiqué ora yobetsicaiguë
matsiguenga, iroro canténguicha iátaji
Quirisito jonoqué cara ibangosonoriqué
Tosorintsi. Ocaninatasanoti aronta
inbabencái canta Jonogaguitequé.
¹²Yaca quibatsica ira itingomi saseriroti
iátopianté omagaro osarini tsomaguinta
ibangoqué Tosorintsi, cara inasanti
Iriro, yáganéro iraraa chibo aisati irasi
itiomijani sérari baaca. Irari Quirisito
icamobicái Irineni, iraatané irasi iraraa,
aique iáque Jonogaguitequé
isobicomopéri Tosorintsi. Icanqueri Iriri:
“Aroque nacamobitaiguéri antagaisati
matsiguenga arota nagabisaicotajiri.
Yamai pairiraca quemisanquinane
pérrosati intiomoquina Naro aisati Obiro
yaca Jonogaguitequé”. Icamaque patiro,
aroque, yamai quero yogatsitairo
icamaji aisati. ¹³Jirai yametaigacaro oca
joríojegui. Aroca icantaguetiro
quimingari matsiguenga, yóguéneri
Tosorintsi chibo queroca sérari baaca;
ira ibira camobiqueru casintari. Aisati
yóguéro tsinane baaca itaquintiro,
yágairo omamo, iconaguéro nije,
ishaguéquineri ira cantaguetatsi te
onganinate, aro Tosorintsi ijocajineri,
isetajineri. Aique caninataque intsibatai-
mari aitosati quemisantatsiri jegui tenta
inguimingatae yamai. ¹⁴Aroca
posaatabitacari matsiguenga iraraa
ibirapague, irosaaśeretasantantimaro
iraraa Jesoquirisito caninarisonori ini.
Posintsiséretéri Jesos Isére Tosorintsi Ira
timatsi pérrosati, aro iáque corosiqué
icamobicái yosaaséretacái cara
a quemisanqueri; yamai quero
opomirintsisitasitaro abisaicoonta eati,
acanquieri Tosorintsi ora icocacái, te
anguenguero angantajiro ora te

onganinate.¹⁵ Jirai patiro igóiguéro eiro isanguenare Moisés, carari te omoncaratiro. Ainiro acantaguetiro ora te onganinate, ajáqueme aíquero Sharincabeniqué. Aique ipoque Quirisito icamobicáí isetajáiro ora acantagueti te onganinate, yogabisaicotajái, inibabencáí catingasatiqué Tosorintsi, ipacáiro irorai Nibarintsi. Aro yamai icanque Tosorintsi: “Nobetsiquéneri ira nocoiguë ora caninaro, noguénneri Jonogaguitequë cara pérrosati inganinatasantomoquina”.

Pairo icamobibircái Quirisito.

¹⁶⁻¹⁷Aro pinguengaiquero ora yametaiga omatsiguenga. Aitica irasi, isanguenaque: “Cara nangamaque, nocogui irasintémaro nomatsiguenga ora nasi”. Aro isanguenaquero irasi iripajiro aisati iripajiro imatsiguenga asinquimarone ora irasi. Aique cara ingamaque, igóque ira asinquimarone. Queroquerai icami, quero yáguiro. Carari ingamaqueca, aro iráganéro. ¹⁸Aisa ocanta jirai cara Tosorintsi sanguenataqueri Moisés ati ocanta ora ingantaiguë joríojegui. Tiguetinta ingantima ingamaque Tosorintsi, igáqueri Moisés cara iragamagaigueri ibira; aroque omoncaraca ora icanque Tosorintsi. ¹⁹Jirai icomantaiguëri joríojegui Moisés ora icocaqueri Tosorintsi; inibataiguëneri Sanguenari. Aique yóguëri baaca aisati chibo, yáguëro iraraa iconoquiero nija. Aisati yáguë ibiti oisha quiraapitiri aisati casangajengaro jitacha isopo, yoquiero iraraaquë ipotequiero oshaguëpéri omagaro imatsiguenga aisati ora Sanguenari. ²⁰Iroontita ishaguëqueri imatsiguenga, icanqueri: “Aroque nocomantaiguëmiro Irinibare Tosorintsi, yamai nagátaiguëmi pingantiro. Nashaguëantémiro oca iraraaca arota

pigóigue cara iromoncaraquero Tosorintsi antagaisati ora icantaiguëmi. Icanque Iriro: ‘Aroca pérrosati pinguemisanquina, aro pérrosati nangábintaiguëmi’”.²¹ Aique ishaguëquero ibango Tosorintsi ora iguemisantomento aisati ishaguëtaguequero omagaro ora inaguetatsi tsomagui, ora irasi saseriroti cara icanquero ora igátaiguëri Tosorintsi. ²²Aro isanguenaque Moisés: “Oca iraraaca pobira pogananatéri pairiraca cantaguetatsiri. Queroca icamobitineri matsiguenga ibira, iraraatanéneri iraraa, quero yogabisaicotajiri Tosorintsi quero isetajineri cara icantaguetiro ora te onganinate”.

Patiro icamobicáí Quirisito.

²³Yaca quibatsica pinabitaca ibango Tosorintsi aisati omagaro inaguetatsi tsomagui. Iroonti osiacagomento ibangosonori jonoquë. Caninataque ishaguëtaguequero pongotsi yaca osobica, yoganinatancaro iraraa ibira. Carari te ongomeite iraraa ibira organinatiro ibangosonori Tosorintsi cara Jonogaguitequë aisati orapague inatsi canta. Canta, iroonti caninatatsi basiniati iraraa caninajaro pabisiro iraraa ibirapague, iroonti iraraa Jesoquirisito. ²⁴Aroque icamobicáí Quirisito icaniatanai. Te inganaque ibangoquë Tosorintsi yaca ora yobetsiquë matsiguenga iroonti osiacagomento ora inatsi jonoquë, carari iáque Iriro Jonogaguitequë, aro icapé catingasatiqué Tosorintsi cara ibangosonoriquë cara inibabempái. ²⁵Ira itingomi saseriroti iátopianté cara inasanti Tosorintsi, omagaro osarini yágapininquiero iraraa sérari baaca aisati irasi chibo; te iráguiro irasi iraraa. Carari Quirisito te iraraatapinintaje irasi iraraa, patironta icamaque Iriro.

²⁶Arome irágopiantërome iraraa Tosorintsiqué, aisatime ongantimame ingamopiantë tojai cara yobetsiquéro quibatsi irooti yamaica. Carari yamai patiro ipoque, patironta icamobiqueri omagaro matsiguenga iragabisaicotasan-taigairi quemisantatsiri, arota Tosorintsi iromaguisantineri ora icantagueti te onganinate. ²⁷Igóiguë eiro cara patiro ingamaque matsiguenga, aro ocarati, quero yogatsitairo icamaji. Cara ingamaque poro, aique ingomantégotéri Tosorintsi pairoraca inganque aitosati negaraca iriáte. ²⁸Aisa icanta Quirisito patironta icamobicái iragabisaicotraigairi tojai matsiguenga, quero iquengairo Tosorintsi ora icantagueti te ongomeite. Aiquenta iribocapae Quirisito aisati, carari quero ipocasiti ingamobitajiri matsiguenga ora icantagueti queronta icamaji aisati. Iribocapae iráganéri jonoqué iraegui aguiaiguëri.

**Tigueti ongantima organinatái
isanguenare Moisés.**

10 ¹Pinetsaigero, omagaro ora isanguenatocoque jirai Moisés irianti irosiacagamento Quirisito Ira bocapénguit sine aiquenta, Ira caninarisonori. Cara ipogopé Quirisito, icábintssasantacái, yoganinaséretacái, carari jirai ira itingomi saseriroti yógapininqueri ibirapague antagaisati osarini ira tigueti ingantima iraganinatiri matsiguenga ira mapéri ibira. ²Arome organinaséretérime matsiguenga iraraa ibira ira yóguéneri Tosorintsi itaquineri, querome yogatsitairome cara yógapininqueri ibirapague omagaro osarini queronta iquengairo ora icantagueti te onganinate. ³Carari yógapininqueri ibira antagaisati osarini, iroro ora oqueancagopiantaguéqueri cara ainiro icantaguetiro ora te onganinate

⁴tiguetinta agabeirone organinaséretiri matsiguenga iraraa sérari baaca aisati iraraa chibo. ⁵Cara ipoque Quirisito yaca quibatsica icanqueri Tosorintsi:

Te piniacaninatiro iraraa ibirapague, te pinintiro imemiro tenta organinaséretiri matsiguenga. Pigáquina yaca nibogobitaiguëri omagaro matsiguenga arota nangamobitaiguéri naganinasére-taiguëri. ⁶Te piniacaninatiri omagaro cara yógapinintimirí ibirapague aisati itagopiantémiri arota piganinatantimarime matsiguenga. ⁷Aique nacanquemi: “Pabati Tosorintsi, aroque nípocasiquemi yaca nangantasantémiro omagaro ora picocaquina. Nomoncaraquemiro antagaisati ora isanguenatocoquina jirai Sanguenariquë”.

⁸Cara aroqueque icanque: “Te pinintiro cara yógapinintimirí ibirapague aisati itagopiantimirí, te piniacaninatobéri”, omagaro ora isanguenaque Moisés, ⁹aique icanque: “Pocaquina yaca nangantasantémiro omagaro ora picocaquina”. Yamai teni ongomeite cara iromapéneri Tosorintsi ibira matsiguenga tenta organinatiri ira casintari, carari yamai icantsantiro Quirisito ora icocqueri Tosorintsi ora yoganinaséretantaigacari matsiguenga quemisantatsiri. ¹⁰Patiro icamobitaigacái Jesoquirisito, quero icamaji aisati, imoncaratasantéro ora icogui Tosorintsi. Yosaaséretasantacái, aisati omagaro quemisantatsiri, cantaca te angantague-tématiro pairoraca ora te onganinate.

**Ira óguiri ibirapague teni
iragabisaicoontimari. Iranti Quirisito
agabisaicoontatsi.**

¹¹Aro icantopiantabita saserirotijegui, yógapinintineri Tosorintsi ibirapague,

itagopiantëneri, carari te organinatiri ira cantaguetatsi ora te organinate. ¹²Ira Quirisito patiro icamobicáí, yoganinasë retaiguëri antagaisati quemisanqueri, ijocajineri ora icantagueti quimingaro. Aroque moncaraca. Aique isobiaque ibacosonoriquë Tosorintsi,

¹³yoguiaqueri Iriri irooti cara iragabeineri omagaro ira quisaneinqueri Quirisito. ¹⁴Patironta icamobicueri omagaro ira icoigaiguë Tosorintsi, yoganinasëretasantaiguëri. Tosorintsi iniaiguëri cantaca te ingantaguetëmatiro cagaro caninatatsi. ¹⁵Aisati pogometasantacái Isëre Tosorintsi, igóiguë eiro iroonti aisonori. Jirai isanguenatacaqueri comantantatsiri:

Icanque Atingomi: ¹⁶“Aiquenta nongomantaiguëri irorai Nibarintsi cara nogótacaqueri ora nococaqueri, aisati nangueanca-gaiguëri Nanibare, quero ipeicotaro”.

¹⁷Aisati icanque:

Quero naquenguëtairi aisati ora quimingaro icantaguetomoquina.

¹⁸Pinetse, aroqueca Tosorintsi icábintsaigairi matsiguenga ora icantagueti te ongomeite, aroqueca yomaguisanquineri, quero icoicotajiri cara imairi ibira ingamobiqueru arota iraganinatiri matsiguenga.

Intsome ajátasitiri aretimari Tosorintsi.

¹⁹Nopiguemisantane, aroque icamobicáí Quirisito iraabiritanacái, yogabisaicocáí. Yamai igóiguë iniacaninatacái, quero otsorogui arequimarinica Tosorintsi yamai. ²⁰Jirai cara ibangoquë Tosorintsi aiti yotigantaro oquibepiriga; potiaqueri saseriroti querota iqui cara inasanti Tosorintsi. Aique icamobicáí Quirisito icaniatanai, yaretacacái Tosorintsiquë. Iroro te inaguëtaje yamai ora

yotigantaro. Iroro yamai otsitiguëpari Tosorintsi tenta otsoroguiri. ²¹Yamai isaserirotitë Quirisito, Irianti Itingomisonori Saseriroti inibabentaiguëri quemisantsirijegui. ²²Iroro yamai intsome ajátasitiri aretimari Tosorintsi, quero otsoroguiri aroquenta igóiguë cara icamobicáí Quirisito isetajáiro ora acantagueti quimingaro, yoganinasëretancáiro Isëre. Yamai igóiguë cara iniacaninatacái, yosaasëretacái. ²³Aisati igóiguë cara iromoncaraquero Tosorintsi omagaro ora icancái, quero yamatobitái. Yamai caninataque ongomantaguetiri basini matsuengua oca aquemisantocoquerica.

²⁴Intsome yamai anguengabacagai-guema arota omitocotobaguima. Intsome asintsisëretaiguéri opiguemisantane iranintobaganëma aisati ingantiro ora caninaropague. ²⁵Intsome opatabiritimari Quirisito përosati. Quero picantari ibega irapague omaguisanqueri te inguengairi. Popatoitacaguimari popiguemisantane pisintsisëretobaguima pigótinta quero ocosamaniti cara iribocapae Atingomi. Caninataque pinganinabentiri aisati piganinatobagaiguema. ²⁶Pinetse, aroca igóiguë ora aisonori cara icamobicáí Quirisito arota iragabisaicotajiri matsiguenga, caninataque asëretimari anguemisantsantiri. Te organinate otsoinguiri ojocajiro cara aquemisanqueri. Ira cantatsi; “Quero naquemisantajiri Quirisito, nangantaguetirota pairoraca ora nongoque naro”, teni irinaje basini ira agabisaicotajirine. ²⁷Aisa aiquenta inguisainaquaqueri iriro Tosorintsi iratsipiriacquaqueri Sharincabeniquë omagaro ira tsoengaiguiri. Iratsipiran-tequero cara tsitsiquë ira iguisanejegui. ²⁸Yametaiga jórójegui iragamagaiguëri ira tsoenguëro isanguenare Moisés, te

inguemisantiro. Aintaca pite queroca maba ingantocoitëri: "Ira cantaguetiro ora te ongomeite, naniaqueri", aro iribasiaqueri imatsiguengajegui, quero yogasëretocotari. ²⁹Ira tsoenguëri Itomi Tosorintsi ingantocoqueri: "Itsipiriasicaro icamaque Quirisito, itsipiriasicaro iraatanë iraraa, querojenga yogabisaicotajiri pairiraca", aisati itsoinguëro Isëre Tosorintsi, ora cábintzacáai, ¿Caninataqueco ingasítigatasantiri iriro Tosorintsi? Aisonori iratsipiriasanotaqueri aroquenta imaintëro iraraa Quirisito ora yosaasëretantabecari.

³⁰Igóiguëri Atingomi cara icanque jirai: Aiquenta Naro quisaguérine ira tsoengatsiri, Naatisati atsipiriacquerine.

Aisati icanque:

Aisonori, nongomantëgotaiguëri matsiguengajegui pairoraca ingantaiguë aisati negaraca iriáiguë.

³¹Irironta cobeingarisonoriguiente, aisati catimancerisonori, intsome aniacobeingatasantiri Tosorintsi Ira quisasanoiguërine ira te inguemisantiri, iratsipiriasanotagaiguëri.

Quero pitsorogui pitsipiribentineri Quirisito.

³²Pinguengaiguema ati picanta jirai, cara irorai iquemisanthaiguëri Quirisito. Iguisaguëmi matsiguenga cara iquemisanque, itsipiriacagaiguëmi, carari pabequero antsinisati, përosati cara iquemisanqueri. ³³Yapatobiritai-guëmi matsiguenga iguisaguëmi icantaguebiriquimiro catsimari, isérontaiguëmi, itsipiriacagaiguëmi. Aisati picarataiguëri popiguemisantane ira itsipiriacaque; pogasëretocotaigacari, pomitocotaiguëri, picaninatagaiguëri. ³⁴Picantaneintégotéri ira yomingaiguë. Aisati cara yágabitsataiguëmiro ora

pasintagueta, pinintacaqueri, te popégatimari, picaninataiguë pigóiguënta cara quero yágabitsatimiro cara itimacagajimi Tosorintsi yaca aisati itsibatimi, aisati quero yágabitsatimiro cara aiquenta përosati pintiomoqueri Tosorintsi Jonogaguitequë. ³⁵Iroro quero pijocaguëtajiro cara piquemisanqueri Quirisito, quero popeicotari pigótinta cara aiquenta ingábintsa-stantiguëmi Tosorintsi. ³⁶Caninataque antsinisati pingantiro omagaro ora icocaquemi Tosorintsi, aique iromoncaraquemiro antagaisati ora icantanasonötëmi. ³⁷Icanque Tosorintsi Sanguenariquë:

Pënibaque iribocapae Atingomi, quero ocosamaniti. ³⁸Ira quemisanquinane përosati, naniacaninatëri cantaca te ingantaguetëmatiro ora te onganinate, aisati nantimacagajiri yamai aisati aiquenta intiomoquina Jonogaguitequë. Carari aroca irojocajiro cara iquemisanquina quero nacaninabentiri.

³⁹Carari teni angarataigueri eiro ira tsorogatsi jocairo cara iquemisanque iriáiguë Sharincabeniquë. Përosati cara aquemisantänë eiro, ajáque aiquero Jonogaguitequë.

Ora icantaiguë quemisantasantsirsiri jirai.

11 ¹¿Ati ongantima anguemisantai-guëri Tosorintsi Ira te iraneingani? Aquemisanqueri, igótasantiguë cara iromoncaratasan-téro Tosorintsi antagaisati ora icancái. Aiti tojai teraiquerai aneiro, carari aquemisanqueri Tosorintsi, igótasantiguë eiro aniaiguëro aiquenta ora icasisjacái. ²Iquemisantaiguë jirainisati, iroro ora igónijintacaguëqueri Tosorintsi cara iniacaninataiguëri. ³Aquemisanque,

aro igóiguë jirai cara inibatë Tosorintsi, ora pinanca quibatsi, Jonogaguise, aisati omagaro ora inaguetatsi. Inibatëtiguë, pinanë. Te ine pairoraca ora te irobetsiquiro.⁴ Jirai Abel iquemisanqueri Tosorintsi cara yamapéneri ibira, irooti iniacaninatan-cari Abel cantaca te ingantague te ora te ongomeite. Ira Cain, ireinti, te inguemisanteri Tosorintsi cara yamapéneri ibanguire; iroro te iraniacaninataguëtiri iriro Tosorintsi. Ora yamapé Caín te organinatiri Tosorintsi, orari irasi Abel iroro aganinatéri. Aro Tosorintsi igónijintaca-queri Abel cara iniacaninatéri. Icamaque Abel, carari caninataque angantimari ibega iriro cara iquemisanqueri Tosorintsi, aro iraniacaninatacái aisati.

⁵ Iquemisanque Enoc, yoginanatéri Tosorintsi. Iroro te ingamaguëte; canianiro yáganéri Tosorintsi Jonogaguitequë. Icogabecari imatsiguenga, te iranajiri aroquenta yáganéri jonoquë. Cara terai imeguima, icantocoqueri iriro Tosorintsi: “Naniacaninatasantirini Enoc”. ⁶ Queroca aquemisantiri Tosorintsi, quero organinatiri. Aintaca cogatsi iraretimari, caninataque irajite cara aisonori ainta Tosorintsi, aisati caninataque iragueiri irotopitiri cara iromanocopéri, ingábintsabaqueri iraegui cogasantiri.

⁷ Aisati Noé iquemisanqueri Tosorintsi. Icanqueri: “Noé, aiquenta opoque oquibeguinte angani, onangasantanëma ongaaretanë omagaro quibatsiquë. Pobetsiquiro oquibe pitotsi ora pabisaicoontëma”. Terai oneingani angani terainta omariguëmate carari iquemisanqueri Noé. Tojai osarini yobetsiquero pitotsi. Icamanaaigabita-carri imatsiguenga carari te inguemisan-

taiguera. Aro yotetaiganaca Noé, iina, itomi icarati maba, aisato iraniro maba. Yabisacoontaro ora pitotsi, te ingamaigue, ijogataigaca imatsiguenga tsoengatsiri cara ponangasananaca niya. Tosorintsi ipoguriaiguëri antagaisati. Irianti Noé abisaicotajatsi irironta quemisanquenguitsi aro iniacaninatéri Tosorintsi cantaca te ingantague te ora te onganinate.

⁸ Aisati Abaram iquemisanqueri Tosorintsi. Icanqueri: “Abaram, nanintini pijáte basiniquë quibatsi ora noniaguëmira. Nomëmiro pasinquimaro piguebatsite”. Aito cara iquemisanque Abaram, iáque cara teraquerai irogóte negaraca iriátë. ⁹ Përosati iquemisanqueri Tosorintsi cara iquenagueque itimabaguitabitaca tenta irisobigasante cara basiniquë quibatsi ora icanqueri Tosorintsi cara irasintëmaro. Te irobetsique caninaro ibango iroro cantënguicha itimi tocoyapangoquë cantaca cáripa. Aisati icantari Isac aisati Jacob ira icanque irootisati Tosorintsi cara irasintëmaro quibatsi carari teatisati irisobigasante cara quibatsiquë. ¹⁰ Itimaque caninasati tocoyapangoquë aroquenta iquiero basini poeboro inatsi jonoquë. Igóque cara iriátë Jonogaguitequë, intsibatai-guëmari omagaro quemisantsatsiri, intimaque pongotsiquë caninaro aisati coshori, ora te irobetsiquiro matsiguenga Irianti Tosorintsi obetsiquero.

¹¹ Aisati oquemisanque Sara. Iroonti sirabaro, te ontsomae otomi, aroque ontiasiporotasantë cara icanquero Tosorintsi: “Aiquenta pintsomaaque pitomi”. Aro oquemisanqueri, pigóque cara quero yamatobitiro Tosorintsi, iromoncaraquero Irinibare. Aro yagobiacaquero cara pogüë, otsomaaqueri otomi. ¹² Aisati aroque

intiasiparitasantanë Abaram, pënibaque ingamaque. Te irine itomi carari yagobiacaqueri Tosorintsi cara itomintacari Isac. Yamai tojai icarataigui imatsiguenga Abaram, te irogóttingani atiraca icarataigui.

Icantaigari ibega jonogasati te irogóttingani atiraca icarataigui. Aisati tojaisonori ini icantaigar omaniqui onamijaquë oquibeguiente angaare, cara tojaisonori pini.

¹³Aro icamaiguë irirojegui quemisanraigatsiri; itimabeca cara Canánquë carari te iraniasantaiguero omagaro icantasantaiguëri Tosorintsi. Te iraniasantiro, iroonti igótasantaiguë cara imaignuëri Tosorintsi ora icanque; aiquenta iraniaquero. Aro iquemisanraigüeri, icaninataiganaque, icanque: “Tenta pérosati nantime yaca quibatsica, quero nisobigasanti yaca”.

¹⁴Cara icanque negaca, igóiguë eiro cara icogasantaiguë iriáigue cara pérosati intimasantaiguë. ¹⁵Arome irisérataiguëma iripigaiganajimame cara quibatsiquë cara ipaniaigaca jirai, aro iriáiguëme. ¹⁶Carari icogaiguë iriáiguë caninaguiteroquë cara Jonogaguitequë ora abisëro pairoraca poeboro yaca quibatsica. Tosorintsi te iripasiquibirtaigueri, icanque: “Irirojegui notomi, Naronta Itosorintsite”. Icaninabentai-guëri Irilo. Aisati canta jonoquë Tosorintsi yobetsicaiguëneri caninaro pongotsipague.

¹⁷⁻¹⁸Aro icantasantëri Abaram Tosorintsi intomintëmari Isac aique intojaiganaque imatsiguenga. Cara iquibianë Isac icoque Tosorintsi iraniantimari ira Abaram aisonorica iquemisanqueri. Icanqueri: “Póguinari pitomi Isac, pitaguinari”. Aro iquemisanqueri Abaram, iáque, pënibaque iróquerime itomi ira paniro. ¹⁹Iquiañca Abaram: “Aroca nogueüri Isac

iragabeiro Tosorintsi iraganiatairi”. Aro pënibaque iróquerime Isac cara icanqueri Tosorintsi: “Quero pogueüri pitomi. Aroque nariantëmi. Yamai nigóque piquemisantasantina”. Te ingame Isac, carari icanca icamaqueni Isac aisa icanca yoganiatairini Tosorintsi.

²⁰Aisati iquemisanque Isac, iroro ora icantocotaguëqueri itomi pite ijitaiga Jacob aisati Esaó. Yamanocoqueri Tosorintsi: “Pingábintsécobentinari notomi pitirooti”. Aro aiquenta icábintsécobenqueri tojai. ²¹Aisa icanta Jacob iquemisanqueri Tosorintsi.

Pënibaque ingamaque, aroque yoticaro igotiqui, yoguitomocari Tosorintsi yamanaqueri: “Pingábintsécobentinari nacharine pitirooti itomi José. Pomitojaiganaqueri”. ²²Aisati José iquemisanque. Jirai itimi Ejípitoquë iriro aisati omagaro imatsiguenga, carari igóque cara aiquenta iriáigae jorío jegui canta irasiquë iguebat site. Cara icamaque icomantaiguëri imatsiguenga: “Pënibaque nangamaque. Aiquenta cara pijáigae aguebatsitequë, páganainaro notonguiporoqui, pitiopainaro canta”.

²³Aique ira itingomi Ejípitosati igobeingarite iniaiguëri jorío jegui cara itojaiganaque. Aro itsorogaiguëri tojaisonorinta inanë. Igáqueri cara irojogatéri njajaquë iraegui itomi jorío ira irirai iboguënguitsine. Iquemisanqueri Tosorintsi ira tomintaigari Moisés. Cara iboguë, inioberi caninari ini, aro te inguemisan-tiri ira cobeingari, imánopitëri itomi maba manchacori arota quero yóguiri. Igóque iriri aisati iniro cara Tosorintsi ingábintséri itomi iripégabintëri. ²⁴Aro te ingame Moisés. Aique iquibianë obangoquë irisinto igobeingarite Ejípitosatiegui. Aro iquiañca: “Teni

nongogue nomatsiguengatimari Ejípitosati, naanti jorío".²⁵ Igóque cara joríojegui iquemisantaiguëri Tosorintsi, iroro itsipiriacagobitaiguëri Ejípitosati. Aisati igóque Moisés cara iriro itomitsari Baraón ira cobeingari. Iniacaninataiguëri Ejípitosatiegui aisati inganquimame irirome Ejípitosatisonori. Arome ingoquero, inganinabenquerome antagaisati inaguetatsi cara Ejípitoquë. Aisati igóque Moisés aroma irojocanérime imatsiguengasonori ingantaguequeme ora te organinate. Aro ijocanéro omagaro irasi Ejípitosati, icoque intsibataiguemari imatsiguenga-jegui, cara iratsipiriaiguë. Igóque aisati cara inguisanijinqueri iriro Ejípitosati.²⁶ Aisati iquianquero ora caninatasantsiri. Ijique: "Aiquenta Tosorintsi iragáqueri Agabisaicoontatsiri (Ira jitacha Quirisito) iragabisaicotaiguëna. Aro caninataque nantsibatëmari nomatsiguenga, natsipiriorqueri Ira Agabisaicoontatsiri, pabisëro cara nasintaguequimaro omagaro inaguetatsi Ejípitoquë noguaquerinta Tosorintsi ingábintssasantëna aiquenta".²⁷

Aroquenta Moisés iquemisanqueri Tosorintsi Ira te iraneingani, te intsoroguiri igobeingarite Ejípitosati. Aro ijocanéro Ejípito, igóquenta cara itsibatacarí Tosorintsi.²⁸ Aisati iquemisanqueri Tosorintsi cara icanqueri: "Moisés, aiquenta nagáqueri nasaanganetsite irabisanaque jonoica Ejípitoquë, iróqueri itomijegui tsoengaigatsiri, irianti itomi obatatsi camënguitsine. Obiro aisa pomatsiguenga, pigamagaiguërica oboina oisha, pomotsotiro iraraa onamiquë omoro pobangopague, iraniaquero iraraa, aro quero iqui nasaanganetsite ógantatsiri, quero icami pitomipague cara pini iraraa oisha. Aisati popaiguero pan te ine ora

piponganta". Aro Moisés aisati imatsiguenga iquemisantaiguëro Irinibare Tosorintsi; yogamagaiguëri oishapague, yoguëro iraraa. Te ingamaigue itomi obatatsi joríojegui. Carari icamaiguë tojai itomipague Ejípitosati.²⁹ Aroquenta iquemisantai-guëri jorío, Tosorintsi yobetsiquëneri abatsi piriabtsaro cara imontiaigancaro joríojegui oquibe Angaare Quiraajari. Ipatimaiguëri isoraroteegui Ejípitosati, ijogataigaca antagaisati cara pipigatanaa nija.

³⁰ Aisati aroquenta Josoé aisati joríojegui iquemisantaiguëri Tosorintsi, 7 cataguiteri ishongaigaparo poeboro ojita Jericó yanëitaiganaque. Aito cara opariaque oticoro Jericó.³¹ Aro yogamagaigapéri omagaro Jericósati. Iroonti yogabisaicotajiro Rajab; jirai oniobintiri séraripague ira cagari ojime carari yamai aroque oquemisanqueri Tosorintsi cara yareca iragátane Josoé cara inetsasantëro Jericó. Págobëri caninasati omitocoqueri oquemisan tobë rinta cara icomantëgotëri Tosorintsi.

³² ¿Pairi basini nongomantëgotë? Quero cotonguiboro nacantocotimiri tojai basini matsiguenga. Ainta Guereón, Barac, Sansón, Jepeté, aisati David, Samoel, aisati comantantatsiri-jegui —ainta tojaisonori quemisanqueri Tosorintsi.³³ Iquemisanque, iroro ora yomanátaguëqueri cobeingaripague, yágabitsaqueri iguebatsite yasintaiga-paro; caninasati itingomibintaiguëri imatsiguenga icantaiguëro ora icocaqueri Tosorintsi; iniaquero cara Tosorintsi imoncaraquero Irinibare; ijoquengani cara secaripaguequë, carari Tosorintsi yomisantëri, te iratsiquiri secari.³⁴ Basini quemisantatsiri ijoquengani pamariquë, iroro cantënguicha te iritaguima. Basini icogabeca iricaraquerime sabiriquë,

carari yogabisaicotobëri Tosorintsi. Ijanaitë, carari yosintsitaiguëri Tosorintsi yogaguibegajiri. Imitocotai-guëri Tosorintsi cara yagobiaqueri ira omanátachari quisachari, yomisigaiguëri omagaro.

³⁵Oquemisanqueri Tosorintsi tsinane, iroro yoganiataguëtajiri icabiritajiri otomi camabitënguicha. Ainta basini quemisantatsiri itsipiriaiguë, icanqueri: “Aroca pijocajiro cara piquemisanque, aro nopabaquëajimi quero natsipiriacaguimi”. Carari yotabitanëri: “Quero nojocajiro cara naquemisanqueri Tosorintsi. Aiquenta iraganiataina, nantiomopëri Iriro”. ³⁶Ainta basini quemisantatsiri, isérontaigacari, ipasataiguëri tac tac tac, yoguëshotagarrantëri sogatsaquë coshotsari, yomingaiguëri. ³⁷Basini ibasegaiguëri. Aintapague itotaiguëri serochoquë yogamagaiguëri, basini icarataiguëri sabiriquë. Basini te inguitsagatima caninasati, iroonti icanaque imasi oisha aisati imasi cábara. Iquenagueque canta tenta ine ibango irasi. Ocoguitiomotai-guëri pairoraca, icantaguebiriqueri catsimari, itsipiriacagaiguëri.

³⁸Isigopitaigacari ira quisaguëri, iquenagueque cara tera ontimingani aisati otispaguequë. Imánopitaigacari quisaguëri omoropaguequë tongagari aisati quibatsi. Icaninatasanti, carari te irágacaninatiri ira quisaneiantatsiri tsoengatsiri, te iranintaiguéri.

³⁹Iquemisanque icaegui, iroro ora igónijintacagaiguëri Tosorintsi cara iniacaninataiguëri, carari te iraniasantaiguero omagaro icantasantai-guëri Tosorintsi, iroonti igótasantaguë ora aisonori imaiguëri Tosorintsi aiquenta iraniaiguëro antagaisati icanqueri. ⁴⁰Tosorintsi te ironijagaiguéri iriro ora yobetsiquineri icocaquerinta iraguaiaigacári eiro. Aiquenta ironijagai-

guëri omagaro quemisantatsiri omoncaratobaquima cara imaáiro Tosorintsi antagaisati, iriro aisati eiro, ora yobetsicacái icasijacái, aisati iraganinaséretasantacái.

Pinguengueri Jesos, piguiatiri.

12 ¹Aro tojai iquemisantaiguë icaegui nocomanntégötëca. Cara anguemocotaiguëri omitocacá anguemisanqueri Tosorintsi. Aisati inetsaigacái yamai igóiguë pairoraca acanque eiro. Yamai nosiacagantëmiro: ¿Teco pigóte ora yameta oboina irisiganëma irogóontima pairiraca obaquenguitsine? Cara irisiganëma irojocanéro iguitsagare arota irisigasan-tanëma. Aisa ocanta caninataque ojocanéro pairoraca oticacá ora te ongomeite, pairoraca comëtomocái, cara anganquineri Tosorintsi ora icocacái. ²Pérosati intsome anguengueri Jesos Ira quemisantasnotatsi. Iquemisantacaqueri matsiguenga, yogabisaicotraigairi. Tojai itsipiribencái cara corosiquë jirai. Carari igóque iráganancaí canta Jonogaguitequë, cara itsipiribencái, te iripasiguitiro. Aique yogainocanaa. Yamaica ainta isobiaque ibacosonoriqüë Tosorintsi, itsibatacari iragáantomentoquë. ³Jirai tojai iguisaguëri tsoengatsiri Ira Jesos, tojai itsipiriacaque. Yamai pinguengasantiri arota quero pogaséreta, quero pitsirisharo cara itsipiriacaque obiro, quero pijocajiri Quirisito.

Tosorintsi yogatingatajiri quemisantatsiri ira cantiro ora te organinate.

⁴Yamai picantabecari cantaguetatsiri: “Pijocajiro ora picantagueti te organinate”, carari terai inguisemi, terai ingantaguebiritimiro catsimari, terai iróguimi, terai piraatanänéri Quirisito piraa. ⁵¿Aroco pomaguisan-

quiero cara itomintëmi Tosorintsi? Aisati isanguenatacaqueri jirai cara icanquemi Tosorintsi:

Notomi, cara nacamanaaque mi nogatingatajimi, quero pipëgatina, quero piguisina, quero pitsirisharo; Naanti Pitingomi. ⁶Cara ingantagueque te organinate nanintane, nacamanaaque ri, nogatingaqueri. Nogótacaqueri cara te nanintiro ora icantagueti. Cara natsipiriaca quemi pigóontëma cara notomintëmi.

⁷Cara yogatingaqueri Tosorintsi, quero pitsirisharo. Inintaiguëmi, itomintauiguëmi, iroro iragatingataguë quimi. Aisa ocanta ametaro eiro cara acamanaairi otomijegui. ⁸Omagaro sérari icamanaaque ri yogatingaqueri itomi. Aisati Tosorintsi. Queroca yogatingataiguimi, cagaribi obiro itomi, irisinto; te pomatsiguengatimari. ⁹Jirai cara eiro janequiquerai yogatingacá i ra asintái, aro aquemisantaiguëri. [¿]Teco aisati caninataque antingomintimari, ominguiri Tosorintsi Ira asintái, Ira timasëretacagái yaca quibatsica aisati intimacagajái përosati Iriroqué canta Jonogaguítiquë? ¹⁰Iraegui asintái yaca quibatsica yogatingacái yogomecái cara ijitabeca iriro caninaro arota antimantimaro caninasati yaca quibatsica carari quero cosamani atimi yaca. Irari Tosorintsi yogatingacái caninasati igótinta omagaro, yogatingacái arota aisonori yoganinasë retacái. Icogasanti iraganinasëretái icinanatasanotinta Iriro. ¹¹Aisonori teni ongogue iragatingatái Tosorintsi. Ocatsitanacáinta te anganinabentiro, ogasëretocaro. Carari aiquenta anguenguero, anguemisantasantëri; anganinabentiro aroquenta oganinasëretacái.

Quero pomaintiro cara icábintsaigacái Tosorintsi.

¹²Cara pitsirishaca piguiatiri Quirisito aisa picanta pomagotasantaigabitaca, pingabiritanaima, pisintsitae quero pijocajiri Quirisito. Aisonori igusabiritaiguëmi matsiguenga aroquenta piquemisantaiguëri Tosorintsi, carari quero poperata, pinganinasërete.

¹³Caninasati pingomantëgotiri Quirisito pairiraca ijita, pingantineri Tosorintsi omagaro ora icocaqueri. Aique piganinasëretiri popiguemisantane ogasëretabetchari, pinguemisantasan>taguiri iriro. ¹⁴Pingogasantaigue pága caninataiguéri basini matsiguenga carari quero piguisaneintaiguiri quero rootisati iguisaneintaiguimi iriro. Aisati pingogasante pintingomintasantimari Atingomi. Aique iromitocoquemi pintimaque caninasati, iraganinasëretëmi. Cagaribica iraisati Atingomi, quero pitiomotiri. ¹⁵Pigamaiguema arota quero pomaguisantiri Tosorintsi cara icábintse ñemi, quero pijocajiro cara piquemisanqueri. Quero piguisaneintobaga arota quero pamasisëretaguetacagari popiguemisantane pague. ¹⁶Quero pintaguetiro tsinane cagaro pijina, quero pintaguetiri sérari cagari pijime. Quero rootisati pomaintiro cara icábintsaiguëmi Tosorintsi. Quero picantari Esaó ira mainqueri Tosorintsi, te inguengueri. Esaó irianti itomi Isac. Igóque cara ingamaque iriri, irasintëmaro iriro omagaro irasi iriri, aisati ingábintse ñeri Tosorintsi. Aro iquenabaguít Esaó, ipigapaa, págasantëri itasgane. Iniopëri ireinti cara ingoquero maroro quiraaquiro. Inebetaparo, icampëri ireinti: “Igue, pomenaro pomarore nitasegasantëni”. Yotabitanëri Jacob: “Aroca nopëgajimi, ingantocabintëna naanti apati, imënaro iraisati cara

ingamaque, aro nomëmi poperi”. Icampéri: “Aro. ¿Pairo nongobobique cara ingantacobintëna aiquenta cara pënibaque nangamaque yamaica?” Aro ipéri iraperi. Ira Esaó imaintëro cara ingábintsëri Tosorintsi aiquenta. Itsounguetigiro. ¹⁷Carari pigóiguëro cara aiquenta iquengairo Esaó ora icanque. Irargasantaca. Icogabeca ingantacobintirime iriro iriri aisati ingábintserime Tosorintsi. Tigueti ingantima ingantiro iriri aroquenta icantacobintëri ireinti. Aroque Jacob pégairi Esaó. Tenta Esaó iranintiri Tosorintsi, ijoquero cara ingábintsëri aiquenta. Te inguemisante. Aro yamai, quero picantari ibega Esaó.

Ati ocanta icábintsaigacái Tosorintsi.

¹⁸Te piniaiguero ora iniaiguë joríojegui jiraisonori canta oguitojaquë jitacha Sinaí cara icomantaiguëri Moisés ora icocagaiguëri Tosorintsi. Itsorogasantaiguë cara iniaiguëro omanarontsi cobeingari, aisati oquibeguinte coguenticima, aisati otsitinitasantanë cataguiteriquë. ¹⁹Iquemaiguëro itibore cara itibotasan-tanë catsiguesonori, aisati iquemaigaba-quero Irinibare Tosorintsi cobeingari, itsorogasantaiganaqueri. Icantaiguëri ira Moisés: “Quero inibataá querota acami. Pinibatiri obianti”. ²⁰Itsorogasantaiguëri cara icanque Tosorintsi: “Te naninte iriboque yaca oguitojaquë matsiguenga teatisati ibira. Pairiraca boquënguitsine, iragatiquéroca oguitoja, pobasegaiqueri pigamagaiguéri”. Aro itsorogasantaiganaque joríojegui. ²¹Tojaisonoriguiente icobeingatasantë Tosorintsi, irooti cara icanque Moisés: “Notsurogasantëri naro, nomogomogoatanaca”. ²²Obirojegui, tenta pijáigue Sinaíquë, iroro te pintosrogaigaguëte. Iroonti ocanca paretaigaca basiniatiquë oguitoja ora

jitacha Sión cara itimi Tosorintsi catimanerisonori. Aisa ocanta piáiguë Jerosarénquë canta Jonogaguítiquë, paretaigari Tosorintsi pigóigapéri. Icábintsaigacái, quero pitsoroguiri. Aisati pitsibataigapari tojaisonori ironomire Tosorintsi irisaanganetsite cara yapatoibiritaigari, icaninabentai-guéri. ²³Aisati picarataiguëri antagaisati itomijegui Tosorintsi irisanguenatégo-taga Jonogaguítiquë. Aisati ainta Tosorintsi Ira comantégotaiguëri omagaro matsiguenga negaraca iriáte aisati pairoraca inganque. Aintasati isérejegui antagaisati caninari iraegui quemisanqueri Tosorintsi jirai; aroque yoganinaséretaigabaqueri Tosorintsi.

²⁴Jiraisonori Tosorintsi icantsantë cara aiquentata imaguëri matsiguenga irorai Nibarintsi. Yamai imoncaracaro Irinibare cara ipoque Quirisito. Yamai pabencari Jesos pitentaigari Ira camobicái iraatanë iraraa. Iroro yosaatantajái Tosorintsi ora acantagueti te onganinate. Aisati jiraisonori Caín óguëri Abel ireinti, iroro icasitígabiri-queri Tosorintsi. Carari cara iraatanë Jesos, yogabisaicotajái Tosorintsi. Iraraa Jesos caninaro, pabiséro iraraa Abel.

²⁵Jirai iraegui jorío ipégatsacari Tosorintsi cara Moisés yogabiséneri imatsiguenga Irinibare Tosorintsi. Tenta inguemisantaiguëri, itsipiriacagaiguëri. Yamai aisati icogui Tosorintsi irinibatai-guëmi obiro. Quero pipégatsatari obiro aisati; popégatsatimrica inguisiguëmi aisati. Cagari matsiguenga nibacái yamai, Irianti Tosorintsi Ira timatsi Jonogaguítiquë. ²⁶Jirai cara Sinaíquë cara inibatë Tosorintsi yosebatéro quibatsi, carari yamai icanque: “Aiquenta panibati nosebatairo quibatsi, carari quero patiro quibatsi, aisati nosebatëri paba, manchacori, aisati omagaro jonogasati”. ²⁷Icanque:

“Panibati nosebatairo”, aro irojocague-quero omagaro ora yobetsiquë jirai, iritsonguéro ora te onguëshote. Iroonti inaatsine coshori ora tigueti ongantajima osebatima.²⁸ Intsome angarasiatiri Tosorintsi cara ipacáiro intimacacái iragáantanequë cara quero posebataa. Intsome angantineri ora icocacái, intsome angarasiatiri aisati anganinabentiri, intsome antingomintimari Irironta caninarisonori aisati cobeingarisonori.²⁹ Aisa icantaro tsitsi cara otaquero pairoraca, Tosorintsi cobeingarisonoriguiente inguisaiguëri ingasítigataiguëri antagaisati matsiguenga ira cantaguetiro ora te organinate, ira tsoengatsiri.

Icanque: “Pintimaigue caninasati”.

13 ¹Pinintobaganëma obiro aisati popiguemisantaneegui. ²Aroca irarequimi quemisantatsiri ira te pineiri jirai, págacaninatobéri. Jirai ainta yágacaninatobéri carari te irogótiri, yogasomabaqueri caninasati, carari cagari matsiguenga, iranti ironomire Tosorintsi irisaanganetsite. ³Pinguengai-gueri iromingaga, pingábintsaigeri aisatime pinganquimame yominguëtë mini obiro aisati. Aisati pingábintseri ira icantaguebirique catsimari obirona imatsiguenga pitsipiriaque aisati obiro. ⁴Caniñataque iráguro iina sérari, águiri ojime tsinane. Aisati caninataque iraniobaquima ira ágasantobagacha. Carari Tosorintsi ingasítigatéri antagaisati ira aguimintaro iina, aisati omagaro ora aguimintari ojime. Iratsipiriacaqueri pairiraca antaguetiro ora cagaro iina. ⁵Quero picogui irinasante piguireguate, iroonti pinganinabenque ora pasinta inomotimi ipémi Tosorintsi. Icanque Irilo: “Coshoni noguëmi; quero nojocajimi”. ⁶Iroro angantaguëque:

Nigóque cara iromitocoquina Tosorintsi, quero notsorogui quero naquengasëreta, tiguetinta ingantina matsiguenga iramasisë retina nasërequë.

⁷Pinguengueri ati icanta ira quemisantacagaiguëmi, ira ogometaiguë miro Irinibare Tosorintsi. Pinguengai-gueri ati icanta itimaiguui caninasati.

Aisati pingantaiguelmari ibegaiga iriro cara iquemisantasantaiguëri Tosorintsi.

⁸Quero ipasiniatiti Atingomi Jeso quirisito, pérrosati cara icanta, jirai, yamaica, pérrosati. ⁹Pinguemisantans-tiri Quirisito. Quero piquemisantiro ora yogometasitimí matsiguenga.

Caninataque anguemisanterio ora yogomecái Tosorintsi Ira cábintsraigacái yosintsisëretacái. Ainta cantaiguëmi popero oca quero papero ora, carari itsipiriasita tenta organinasëretiri iriati ora irogomeantane, queroootisati poginaninasëretimi obiro. ¹⁰Cara anguemisanquerica Quirisito Ira camobicái, aro iragabisacotajái. Irari saserirotijegui te inguemisanterio; yametaigarao cara yogamaguiri ibira yaagaiguë ibatsa arota irabisaicoontimrome. Carari itsipiriasicaro tenta ogabisacotiri. ¹¹Aro ira itingomi saserirotijegui yógapinintiri ibira, yágapininqueru iraraa yoguëro tsomaguisonoribangoquë Tosorintsi arota irojocanëneri matsiguenga ora icantaguei te organinate. Aique yáganëro ibatsa ibira canta jaanta, sotonta poeboroquë, itaquintiro. ¹²Aisati icanqueri Jesos, yágaiganaqueri sotoquë poeboroquë cara yogamagaguëri. Cara, itsipiriasantë icamaque cara iraganinataiguëri ira matsiguengajegui quemisantaiguërine.

¹³Isérontobitaigacari Jesos matsiguenga. Aisa acanta irisérontaigacái cara aguiatéri. Jemita, intsome

anguemisantiri pérrosati.¹⁴Yaca quibatsica quero atimi cosamani, carari oguaiguë antimopé pérrosati canta Jonogaguitequë.¹⁵Aroquenta aquemisanqueri Jesoquirisito, caninataque angarasiatiri Tosorintsi pérrosati aisati omanocotiri aisati ongomantaguetiri matsiguenga: “Caninarisonoriguiente Notosorintsite Ira natingominacara”.¹⁶Obirojegui, quero pomaguisantaiguero pomitocotobaganëma, aisati pingábintsaigueri popiguemisantane coguitiachari. Oca iroro organitatéri Tosorintsi.

¹⁷Pinguemisantaiguera ira quinguitsatomotimiro Irinibare Tosorintsi, pintingomintimari. Yomisantaiguëmi yogometaitaiguëmi arota iraganinaseretai-guemi piserequë. Aiquenta Tosorintsi irosomitobéri: “¿Pairo pogometaitaiguëri ira piquemisantacaque? ¿Caninasatico iquemisantaiguëmi?” Aro ingomantapéri. ¿Teco caninataque ingantocoquemi: “Jee, caninasati iquemisantaiguëna”? Carari queroca piquemisantiri, ingantocoquemi, “Teni inguemisantina”, aro inguisaitaiguëmi Tosorintsi.¹⁸Najitaiguë te nangantaguete ora te organinate. Tojai nocogaiguë nangantiro ora caninari. Pomanocotaiguena cara nantime caninasati.¹⁹Aisati nocogasanti pomanocotaiguena arota Tosorintsi iranintacaquina naniaigaimi aisati, iromitocoquina naretajimi omanapague.²⁰Aitosati nocoguini ingábintsaigueri Tosorintsi, Ira cogatsi iromagoriasereta-gaiguemi aisati inganquemi pintimaigue

caninasati. Jirai yoganiatairi Atingomi Jesos Ira camobicáí iraabencáiro iraraa. Cara icamaque Jesos, aroque imoncaraquero Tosorintsi ora irorai Nibarintsi ora icantasantë jirai: aroque yobetsiquéneri quemisantatsiri cara iragabisaicotajiri intimacaganëri jonoquë Iriroquë. Aro icantocabintacáí Jesos, yomisantacáí aisa icantari ibega casintari iroishate yomisantaiguëri.²¹Aitosati namanocotaiguëmi cara iraganinatimi Tosorintsi arota pingantaiguero omagaro ora caninari, ora icocagaiguëmi. Aique inganinaben-taiguëmi Tosorintsi aisati Jesoquirisito Ira piquemisantaiguë. Caninataque antingomintimari pérrosati, angantocabentiri “Caninarisonoriguiente Atingomi Jesoquirisito”. Aroque.

Aro ocarati isanguenaquero.

²²Nopiguemisantaneegui, nocogui págacaninatobéro oca nasanguentaiguëmica tenta nomitojaiguero nanibare. Pinguengasantobéro, quero pijocajiro cara piquemisantaiguëri Quirisito.²³Pigóiguë cara yomianqueri Timoteo opiguemisantane. Yamai nongomantaitaiguëmi cara yomisotocajiri; queroca icosamaniti cara iribocapé yaca, nantsibatanëmari cara obirojeguiquë, naniaigaantimi.²⁴Pobetsataiguernari iraegui ogometocotaiguiri Atingomi aisati antagaisati quemisantatsiri cara. Yaca ibetsataiguëmi Itariasati quemisantatsiri.²⁵Nocogui Tosorintsi ingábintsaigueri omagaro obirojegui. Aro ocarati.